

22.2.2021_ Berita Harian_MOSTI_Kapten Hamdan bangga bawa pulang aset berharga

Bekalan pertama vaksin Pfizer-BioNTech tiba di Malaysia

Kapten Hamdan bangga bawa pulang aset berharga

Juruterbang
MH604 pastikan
kumpulan
pertama vaksin
Pfizer-BioNTech
selamat tiba

Oleh Ahmad Suhail Adnan
dan Mahamud Abdul Aziz
ahmad.suhail@bh.com.my

Kuala Lumpur: Takut dan bimbang. Itu antara yang dirasakan Kapten Hamdan Che Ismail ketika menerbangkan pesawat Malaysia Airlines MH604, yang membawa kumpulan pertama vaksin Pfizer-BioNTech ke Malaysia, semalam.

Walaupun penerbangan itu tidak begitu berbeza berbanding rutin penerbangan lain, Hamdan, 49, mengakui ada rasa gentar kerana dipertanggungjawabkan untuk memastikan keselamatan aset berharga untuk rakyat Malaysia.

Mana tidaknya, beliau seolah-olah membawa harapan seluruh rakyat Malaysia dalam penerbangan menggunakan pesawat Airbus 330-300 dikendalikan MABKargo Sdn Bhd (MAKargo) dan jika ada perkara tidak diingini berlaku, Program Imunisasi COVID-19 Kebangsaan pastinya akan tergendala.

Namun, berbekalkan perancangan rapi serta doa, Hamdan bersama anak kapalnya berjaya memastikan 312,300 dos vaksin Pfizer-BioNTech itu selamat tiba di



Hamdan dipertanggungjawabkan menerbangkan pesawat MH604, untuk membawa pulang kumpulan pertama vaksin Pfizer-BioNTech tiba di KLIA, semalam. (Foto BERNAMA)

Lapangan Terbang Antarabangsa Kuala Lumpur (KLIA) dari Singapura sekitar jam 10 pagi, semalam.

"Dari segi persiapan, tidak banyak yang berbeza berbanding rutin penerbangan yang lain, cuma agak berdegar kali ini bila tahu aset dibawa adalah vaksin yang dinantikan semua rakyat Malaysia."

"Saya beritahu pada pembantu juruterbang dan semua anak kapal untuk jalankan tugas seperti biasa, namun pada masa sama bersedia dengan apa jua kemungkinan kerana jika ada apa-apa yang terjadi, saya dan kita semua bertanggungijawab."

"Memang ada sedikit rasa takut jika ada kerosakan atau apa-apa berlaku pada vaksin yang dibawa, namun kami yakin

dengan segala perancangan rapi yang sudah dilakukan," katanya ketika dihubungi BH, semalam.

Vaksin Pfizer-BioNTech itu dibawa dari kilang di Puurs, Belgium dan dibawa menaiki pesawat dari Brussels, sebelum transit di Lapangan Terbang Leipzig Halle, Jerman dan meneruskan perjalanan ke Singapura untuk pengedaran ke negara Asia Pasifik lain termasuk Malaysia.

Hamdan yang berasal dari Tumpat, Kelantan, bertolak awal jam 6 pagi menuju ke Singapura untuk mendapatkan vaksin itu, sebelum berlepas pulang ke Malaysia bersama aset berkenaan pada jam 9 pagi.

Beliau yang memiliki pengalaman selama 29 tahun bersama MAS berkata, antara persediaan

dan cabaran dihadapi adalah memastikan suhu vaksin itu, kerana ia perlu dikekalkan pada suhu sejuk beku.

Memandangkan vaksin COVID-19 amat berharga ketika ini, katanya, kemungkinan unsur jenayah berlaku turut dibincangkan ketika proses persediaan.

"Namun, jaminan pihak berkuasa dan keselamatan bahawa keselamatan aset untuk sampai ke Malaysia pada waktu yang dijadualkan menjadi keutamaan, memberi keyakinan kepada kami," katanya.

Mengakui terharu ketika menerima arahan untuk menerbangkan vaksin itu ke Malaysia, Hamdan serta anak kapalnya berbangga kerana diberi peluang untuk menggalas tugas besar itu.